

BANGKIT SELEPAS MUSIBAH
3 Safar 1443H/ 10 September 2021

الْحَمْدُ لِلَّهِ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ لِيُظْهِرَهُ عَلَىٰ الدِّينِ كُلِّهِ
وَلَوْ كَرِهَ الْمُشْرِكُونَ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ
أَنَّ سَيِّدَنَا مُحَمَّدًا عَبْدَهُ وَرَسُولَهُ، اللَّهُمَّ صَلِّ وَسَلِّمْ وَبَارِكْ عَلَىٰ سَيِّدِنَا مُحَمَّدٍ
وَعَلَىٰ آلِهِ وَأَصْحَابِهِ وَمَنْ تَبِعَهُمْ بِإِحْسَانٍ إِلَىٰ يَوْمِ الدِّينِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Marilah kita berusaha meningkatkan keimanan dan ketakwaan kepada Allah Subhanahu wa Taala dengan melaksanakan segala suruhan dan menjauhi segala larangan-Nya. Mudah-mudahan kita peroleh keampunan di dunia dan akhirat.

Sidang Jumaat yang dirahmati Allah Subhanahu wa Taala.

Penularan wabak Covid-19 di negara ini merupakan suatu musibah yang telah memberi kesan kepada banyak pihak. Terdapat antara kita telah kehilangan ahli keluarga atau kenalan yang

menjadi korban akibat musibah ini. Pihak pemerintah terpaksa melaksanakan Perintah Kawalan Pergerakan dan penutupan sektor-sektor tertentu bagi mengekang penularan wabak ini. Ini menyebabkan sebahagian rakyat hilang mata pencarian seperti diberhentikan kerja oleh majikan dan sebahagian peniaga terpaksa gulung tikar kerana tidak dapat beroperasi.

Di barisan hadapan, pekerja perubatan di negara kita terpaksa bekerja lebih masa. Anggota-anggota keselamatan pula terpaksa dikerahkan berkawal di pelbagai lokasi dan mengadakan sekatan jalanraya siang dan malam. Semua orang merasai keperitan dan diselubungi ketakutan. Musibah ini menjadi ujian yang amat getir untuk ditempuhi oleh kita. Allah Subhanahu Wa Taala berfirman dalam Surah al-Baqarah ayat 155:

أَعُوذُ بِاللَّهِ مِنَ الشَّيْطَانِ الرَّجِيمِ
وَلَنَبْلُوَنَّكُمْ بِشَيْءٍ مِّنَ الْخَوْفِ وَالْجُوعِ وَنَقْصٍ مِّنَ الْأَمْوَالِ وَالْأَنْفُسِ وَالثَّمَرَاتِ ^{١٥٥} وَبَشِيرٍ

الصَّابِرِينَ

Yang bermaksud: *Dan Kami pasti akan menguji kamu dengan sedikit ketakutan, kelaparan, kekurangan harta, jiwa dan buah-*

buahan. Dan sampaikanlah khabar gembira kepada orang yang sabar.

Ayat ini memberi isyarat bahawa Allah Subhanahu wa Taala akan memberikan ganjaran yang besar kepada orang yang sabar ketika diuji dengan musibah.

Sidang Jumaat yang dirahmati Allah Subhanahu wa Taala.

Kita wajib meyakini bahawa setiap musibah adalah kehendak dan ketetapan Allah Subhanahu Wa Taala. Firman-Nya dalam Surah al-Taghabun ayat 11 yang bermaksud: *Tidak ada suatu musibah yang menimpa seseorang kecuali dengan izin Allah; dan sesiapa yang beriman kepada Allah nescaya Dia akan memberi petunjuk kepada hatinya. Dan Allah Maha Mengetahui segala sesuatu.*”

Tidak dinafikan, musibah yang berlaku menyebabkan ramai orang mengalami kemurungan dan tekanan perasaan. Sebagai orang beriman kita hendaklah menghadapinya dengan sikap yang positif. Allah uji kita kerana Allah sayang kita. Allah ingin hapuskan dosa-dosa kita jika kita sabar dan bersyukur menghadapinya. Allah ingin gantikan sesuatu yang lebih baik. Di

sebalik setiap kesusahan dan kesulitan pasti ada sinar harapan. Kuatkan semangat dan perbanyakkan doa kepada-Nya. Antara doa yang boleh diamalkan ialah:

إِنَّا لِلَّهِ وَإِنَّا إِلَيْهِ رَاجِعُونَ اللَّهُمَّ أَجْرِي فِي مُصِيبَتِي وَأَخْلِفْ لِي خَيْرًا مِنْهَا

Yang bermaksud: “*Sesungguhnya kita milik Allah dan akan kembali kepada-Nya, Ya Allah berikan aku pahala dalam musibahku ini dan gantikan dengan yang lebih baik daripadanya.*”

Sidang Jumaat yang dirahmati Allah Subhanahu wa Taala.

Setiap kesukaran pasti ada penghujungnya. Begitu juga wabak Covid-19 ini pasti akan ada pengakhirannya. Ayuh kita bangkit bersama-sama memainkan peranan memutuskan penularan wabak ini. Gandakan doa dan munajat kita tanpa putus asa. Selebihnya bertawakallah kita kepada-Nya.

أَعُوذُ بِاللَّهِ مِنَ الشَّيْطَانِ الرَّجِيمِ

فَإِنَّ مَعَ الْعُسْرِ يُسْرًا ﴿٥﴾ إِنَّ مَعَ الْعُسْرِ يُسْرًا ﴿٦﴾

Yang bermaksud: *Oleh itu, maka (tetapkanlah kepercayaanmu) bahawa sesungguhnya tiap-tiap kesukaran disertai kemudahan. Bahawa sesungguhnya tiap-tiap kesukaran disertai kemudahan.*

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ آيَاتِ وَالذِّكْرِ

الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا

وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ

وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْعَفُورُ الرَّحِيمُ.